

Regional News Unit AIR Aizawl
Wednesday, August 07, 2024

Time - 7:30 -7:40Hrs

REGIONAL NEWS BULLETIN

HEADLINES (MORNING)

- PWD Minister Pu Vanlalhlana chuan fur ruahtui tlain inkalpawhna kawng chhia a thlen chungchangah theihtawp an chhuah tih a sawi.
- Parliament sessionah nimin khan Rajya Sabha MP Pu K. Vanlalvena chuan Mizoram chanchinbu mite harsatna chungchang a sawi.
- Bangladesh-a India mi chengte nen an inbe pawp reng tih External Affairs Minister Dr. S. Jaishankar chuan nimin khan Parliament in hnih a hriattir.
- Paris Olympic neih mekah India hmeichhe wrestler Vinesh Phogat chuan kg 50 freestyle ah final a lut.

<><><>

PWD MINISTER

PWD Minister Pu Vanlalhlana chuan fur ruahtui tlain inkalpawhna kawng chhia a thlen chungchangah theihtawp an chhuah tih nimin khan thuchhuah siamin a sawi a.

Hetianga khuarel chhياتna a lo thlen hian PWD chu a tuar nasa ber pawl Department a ni ziah a. Tun tum chhياتna ah pawh hian an kawng enkawlte him aram a awm lo tluk a ni a ti a. May ni 28-a Cyclone Remal-in a chhut atang khan kawng chhia hriat tur a awm mawlh mawlh mai a. Kawng thenkhat chu metre 100 dan lek leka ping tlat te awmin kawng thenkhat phe chu a kawng chhuat bal nasa tak te, bal hlawk te a awm a. Heng chhياتna hrang hrang thawmtha tura PWD-a a thawhpuite – a te ber atanga a hotu lian ber thlenga theihtawp an chhuahnaah lawmthu a sawi.

Minister chuan leimin then hi zan thim, kawng chung lam atanga lung lo lum thei leh thing lo tlu thei hmu chiang lo chuan thawh mai chi a ni lo tih sawi bawkin nunna chan hial pawh awm theih a ni a. Hetiang taka fimkhur ngai a nih avang hian experience lo ngah tawh zawk Officer-te chuan a theih hram chuan zan thim hnuai a thawk lo turin field lama hna thawktute pawh an chah a ni a ti.

Hetihlai hian, sum dinhmun a that lutuk loh avangin sawrkar tan pawh luhaithlak takzet tih sawi bawkin PWD Minister chuan tunah hian leimin thenna ringawt pawh mi tam tak hnenah vaibelchhe tel leiba an nei a ti a. An khawl hawh-na te pawh dawhthei taka ngak tura ngenin, Central leh State sawrkara Finance lam enkawltute pawh a bik taka an harsatna ngaihtuhsak turin a ngen tih a sawi a ni.

<><><>

YMCA

Aizawl Young Men Christian Association te chuan World Peace Day, 2024 chu nimir khan I&PR Auditorium ah an lawm a. Chief Minister Pu Lalduhoma chuan a telpui.

Thu a sawinaah Chief Minister chuan, khawvel history-ah indona chanchinin hmun a luah tam hle a, Bible ah pawh indona thu a tam hle. Indona hi a lo irhchhuah chhan chu eng pawh ni se, a hmawr bawkna erawh chu dawhkanah inbiakna hmanga chin fel a ni deuh zel thin a ti a. Indopui pahnihna pawh kha Treaty of Paris inremna ziak a ni a, Indopui pakhatna pawh Treaty of Versaille hmanga chin fel a ni. Hei hian ralthuam hmanga inbeihnain remna a thlen zo lo tih leh inngirngona hi inbiakna hmanga chin fel theih a nihzia a tilang a. Buaina hmunah hmasawna a kal thei lova, kum 20 chung rambuai an tawrh tawh atangin chu chu hmuh a ni a ti. Chhungkuaa inrem ila, chhungkua atangin ram din ila, ram leh khawtlang nuam leh ralmuang din a ni ngei ngei dawn a ni, a ti.

Aizawl YMCA President Dr. R. Lalthangliana, Regional Chairman, NE India Region ni bawk pawhin thusawiin, Chief Minister Pu Lalduhoma'n a telpui avangin lawnthu a sawi a. Chief Minister apiangte hi kan ex-officio Patron an nih thu a sawi.

Aizawl YMCA Honorary General Secretary Er. K. Lalsawmvela, chuan UN in International Peace Day atan September ni 21 a hmang a, YMCA hian Indopui pahnih laia Hiroshimaa Atom Bomb thlak ni hi World Peace Day atan an hmang ve thung tih a sawi a ni.



K VENA

Parliament session kal lai mekah nimir khan Rajya Sabha MP Pu K. Vanlalvena chuan Mizoram chanchinbu mite harsatna chungchang a sawi a.

Chanchinbu registration title online-a dilna form-ah duh thlan theih tur tawng hrang hrangte ziah tlarnaah Mizo tawng telh a nih ve loh thu sawiin, Mizo tawng hmangtute zinga chanchinbu chhuahna tur dilna form-ah Mizo tawng a tel loh avangin Mizo tawng chanchinbu a chhuah theih dawn loh tihna a nih avangin online-a dilna form-ah Mizo tawng telh ngei a phut thu a sawi a ni.

Hemi thu hi Pu K. Vanlalvena chuan Union Minister of Information and Broadcasting Pu Ashwini Vaishnaw hnenah ziakin a thlen nghal bawk a ni.



ACCIDENT

Nizan dar 7:00 vel khan Chekawn lam atanga Khawlailung pan lirthei pakhat chu Chekawn bawlhhlawh pahna hmun kawng thlang m 100 velah tlan liamin, a khalhtu Lalrindika Mualcheng khua a thi.

A mi phurh pahnih Lalrinkima leh Remsangpuia Mualcheng khua ve ve ten hliam na tak an tuar a, Khawhlailung Damdawi in panpui an ni a. Hliam te hi a tirah biak theih lohva awmin Damdawi in thlen pui an nih hnuah an harh tawh nia thu dawn a ni.

An chetsual chhan chiah hriat a ni lova, motor hi a chhia a, an siam tha em tia enchhin nana leng paha an khalh haw lam chu an chesual ta nia thu dawn a ni.

<><><>

LSA

Lawngtlaia Lai Students' Association, General Headquarters, hruaitute chuan nimin khan Adviser to Chief Minister, Dr. Lorrain Lalpeklia Chinzah chu a chenna inah hmuin zirlaiten harsatna hrang hrang an tawhte an sawipui.

Lai Students Association hruaitute chuan Gov't. Ramthar High School, South Lungpher - a Mathematics zirtirtu leh Govt. Lawngtlai College-a Political Science zirtirtu indaihlohna leh Saichangkawn a RMSA zirtirtu boral, hmunruak hnawkhah loh pawh hnawkhah vat a nih theih nan adviser to CM hnenah hian an thlen a ni.

Dr.Lorrain Lalpeklia Chinzah chu Lai Students Association ten zirna in hma a sawn theih nana ngaih pawimawh an neihte chu a hlawhtlin theih nan theihtawp chhuaha bawhzui a tum thu a lo hrilh a ni.

<><><>

LUNGLEI POLICE

Lunglei Police te chuan thla hlui July thla chung khan pawh khawihna hrang hrangah thubuai 18 ziaklutin thubuai kaih hnawihah hian mihring 13 an man a ni.

Hei bakah hian Lunglei Traffic Police te chuan July thla chung vek hian lirthei khalhtu dan bawhchhia te hnen atanga sum an chawi tir zat chu Cheng Nuai 1, Sing 1, Sang 2, 700 a ni a, dan bawhchhia sum an chawi tirte hi H MV - 27 atang Cheng Sing 2, Sang 3, 500. L MV - 33 atangin Cheng Sing 2, Sang 1. Three Wheeler - 13 atangin Cheng Sang 8, 700 leh Two Whèeler - 99 atangin Cheng Sing 6, Sang 9, 500 chawi tir an ni a, dan bawhchhia te hi a tam ber chu Document fello leh License neilo a lirthei khalhte an nih bakah lirthei dah phallohna hmuna dahte an ni.

Lunglei Police te hian July.2024 chung vek hian Rakzu Litres 96 tualchung hralhna anga Cheng Sing 4, Sang 8 man hu an man baw k a, hemi kaih hnawihah hian thubuai 3 ziaklutin mihring 4 an man a ni.

<><><>

MNF

MNF Legislature Party chuan buhfai supply tur Tender chhang hniamber te chu dan palzuta hnawlin a aia nasa taka chhang sang zawk te supply hna tam tham tak ZPM sorkarin a pek avangin sorkar sum hloh a tam tham hle an ti a, buffai supply tu thlan chungchangah mawhphurhna la ngamlo ah Supply Minister chu puhin midangte a puhmawh chu pawm chi a ni lo an ti.

MNF MLA ten an leader Pu Lalchhandama Ralte hovin nimin khan Aizawl Press Club-ah thuthar thehdarhtute an kawm a, ZPM sorkar hnuaiia thilthleng pawm harsa an tih te sawiin ZPM sorkarin Card var hmangtuten buhfai Rs 15a an lei thin a leta an tih pun dan chu a uchuak an ti tih sawiin Hetiang mi tam tak khawsak relna kawnga harsatna siam tur chungchanga RAWTNA intan dan leh thutlukna siam a nih dan hi ani MNF MLP chuan pawmtheih niin an hrelo tih an sawi bawk a ni.

ZPM Sorkar chuan an tih loh tur an puan te an ti bawrh bawrh mek an ti a, Thla 8 dawn an sorkar hnu hian an tih tur a an sawi lam hi hawi tan ve tawh se an ti bawk a ni.

<><><>

SCIENCE CENTRE UPGRADATION

Aizawl Beraw Tlang a Mizoram Science Centre thawm that na tur project "Modernization/ Upgradation of Mizoram Science Centre " chungchanga inremna chu kar kalta khan Directorate of Science & Technology hnuaiia Mizoram Science Centre (MSC leh sorkar laipui Ministry of Culture hnuaiia National Council of Science Museums (ten an ziak a,

He thawhhona thuthlung hi Kolkata ah tun thla ni 2 khan NCSM atangin NCSM Director Pu Rajib Nath leh MSC atangin Pu H.Lalsawmliana, Chief Scientific Officer & Member Secretary, Mizoram Science Centre ten an sign a ni.

Mizoram Science Centre hi kum 2003-a hawn a ni a. He Centre hawn tirh atangin vawiin thlengin tlawh tu thahnem tak an awm reng a zirlai leh mipuiin an hlut hle a ni. He Centre-a bungruate leh exhibits hrang hrangte a hlui tawh a, chungho thlak tharna chu he MoU hnuaiiah hian kalpui a ni dawn a ni.

He MoU hian Mizoram Science Centre-a gallery awmsa tam takte thawm that bakah thil thar tam tak dah belh te a huam dawn a. He project hi NCSM, Kolkata te khawih tur niin, sum ruahman hi cheng vbc 3 leh nuai 98 a ni a. NCSM chuan zaa 90 a tum dawn a, kum hnih chhunga zawh fel tura ruahman a ni.

<><><>

EAM STATEMENT ON BANGLADESH

Bangladesh-a India mi chengte nen an inbe pawp reng tih External Affairs Minister Dr. S. Jaishankar chuan nimin khan Parliament in hnih a hriattir. Bangladesh tualchhung buaina chungchangah hian External Affairs Minister hian Parliament in hnihah thuchhuah pe in India mi sing khat leh sang 9 dawn tunah hian Bangladesh-ah an awm thu a sawi a. Heng zingah hian mi 9000 vel chu zirlai an ni a ti a. Thla hmasa khan Dhaka-a High Commission thurawn angin zirlai tam zawk chu India-ah an rawn let leh tawh a ni a ti.

Dr. Jaishankar-a chuan New Delhi-in uluk takin thil thleng a vil reng tih Lok Sabha leh Rajya Sabha hrihlin a bik takin hnam tlem zawk minority te dinhmun a thlithlai reng a ni a ti.

Nimin tlai khan sawrkar laipui chuan Bangladesh buaina chungchangah Political Party tin aiawh inhmukhawm New Delhi-ah a ko a. He hunah hian External Affairs Minister Dr.S.Jaishankar chuan party hruaitute hi buaina thlen dan kimchang a hrihlfiah a. He hunah hian Defence Minister Rajnath Singh, Union Home Minister Amit Shah, Parliamentary Affairs Minister Kiren Rijiju, leh Union Minister leh BJP President J P Nadda te pawh an tel a.

Lok Sabha Leader of Opposition Rahul Gandhi, TMC leader Sudip Bandyopadhyay, NCP(SP) leader Supriya Sule, RJD leader Misa Bharti, SP leader Professor Ram Gopal Yadav leh DMK hruaitu T R Ballu te pawh an tel a ni.

Bangladesh-ah hian zirlai te lungawilohna lantir avanga tharum thawhna nasa chho zel vangin Bangladesh Prime Minsiter Sheikh Hasina chu Thawhtanni khan a nihna atangin a bang a. An ram chhuahsan nghal a ni.

Pathianni khan mipui lungawilo leh police te intawngnaah mi 100 chuang an thi a, mi 1000 chuangan hliam an tuar a ni.

Puan tawh angin Bangladesh ah hian sawrkar hnaah kum 1971 a Pakistan laka Bangaldesh zalenna sualtute tu leh fate tana zaa 30 hauhsak anih duh loin zirlai tam takin lungawlohna an lantir a. Thla hmasa atang khan buaina hi a intan a ni.

Hetihlai hian Air India chuan Bangladesh-a lut leh chhuak an thlawhna thlawk zawng zawng nimin atang khan an titawp nghal a ni.

<><><>

PRESIDENT MURMU

President Draupadi Murmu chuan nimin khan Fiji President Ratu Wiliame Maivalili Katonivere a kawm. Fiji-a cham mek President Murmu-i an khawpui Suva ah ropui taka lo dawnawn a ni a. Suva khawpuiah hian Mahatma Gandhi High School tlawhin Mahatma Gandhi zahna pangpar a hlan a ni. President nen an inkawm hnu hian Nadi lam panin a chhuak leh a ni. New Zealand khawpui Auckland ah vawiin hian hun a hmang leh dawn a ni.

<><><>

FINANCE BILL

Lok Sabha-ah Finance Bill 2024 nimin khan sawiho a ni a. Congress MP Amar Singh chuan Union Budget chuan sum lalut tam ho tan chauh hlawkna a siam tih sawiin mi naran leh hnuaihngung zawkte tan engmah ngaihsakna a nei lo a ti a. Ramchhunga agriculture thanna chu a tlahniam tih sawiin loneitute sum lakluh a leta tipung tura sawrkar hmalakna chu hlawhchhamah a puh a ni.

Hetihlai hian BJP MP Nishikant Dubey chuan Union Budget ah hian Angel tax tihtawp anih tur thu sawiin hei hian startup te nasa takin a pui dawn tih sawiin thalaite tan pawh hna a siam belh ngei ang a ti a. Opposition memberte chu Agniveer Scheme an sawisel avangin a dem thu a sawi bawk a ni.

<><><>

PARIS OLYMPIC

Paris Olympic neih mekah India hmeichhe wrestler Vinesh Phogat chuan kg 50 freestyle ah final a lut a. Heti hian India tan a hniam berah silver medal a hlawhchhuak dawn. Phogat-i hian Semifinalah Cuban wrestler Yusneylis Guzman chu 5-0 in a hneh a. Vinesh Phogat hi India hmeichhe wrestler zingah Olympic final lut hmasa ber a ni.

**Hetihlai hian India mipa hockey team te chuan semifinalah
Germany hneh loin 2-3 in an tlawm a. Spain nen bronze medal
inchuhin an inkhel leh ang.**

